

四庫全書

集部

欽定四庫全書

集部

蘇魏公文集卷

二十八至
三十

詳校官庶吉士臣朱理

檢討臣何思鈞覆勘

總校官進士臣朱鈐

校對官編修臣盧遂

謄錄監生臣施華

欽定四庫全書

蘇魏公文集卷二十八

宋 蘇頌 撰

內制

正月一日皇帝御大慶殿受文武百寮朝賀行上

壽之儀樂章曲名

皇帝舉第一盞酒奏靈芝之曲

嘉端降靈應我皇德熒熒神芝不根而植春秋三秀畫

夜五色物播詩歌聲被金石

皇帝舉第二盞酒奏壽星之曲

倬彼見象於昭于天維南有極離丙之躔既明且大應
聖乘乾誕受景福億萬斯年

皇帝舉第三盞酒奏甘露之曲

泣泣零露雲英醴液和氣凝津流甘委白飴泛杵杯珠
聯竹栢天不愛道聖功允格

賀冬年節詞語

內中侍御已下賀皇帝冬至詞語

伏以日南遠極驗景至于地中斗北中繩候陽萌于物
種福釐均被寰海攸同伏惟皇帝陛下盛德膺期至仁
御宇堯雲在望上當書物之祥禹壁惟輕獨念惜陰之
貴宜民受祿羞耆惟君降茲有永之年嗣乃無疆之歷
妾等幸逢休運獲隸禁庭仰瞻咫尺之顏願介龐洪之
祚

太皇太后詞語

伏以八景朝元奉太微之遊宴五雲辨物占魯觀之機
祥海寓隆平宮闈泰豫伏惟太皇太后陛下功參化育
道契清寧神靈合謀與日還而斗轉晷景循度驗歲美
而物成默而應天地之和靜以待陰陽之定保邦基而
永固延福壽以無疆妾等備數宸闈聯榮婦職仰祝松
椿之筭但傾葵藿之心

皇太后詞語

伏以日候清臺景下盈于尺表陽生密室氣上應于飛

灰萬國同休六宮均慶伏惟皇太后殿下德隆軒曜道
應坤元躬孝養於東朝內隆陰教推慈儀於正宁益懋
聖功當七日來復之期膺萬壽無疆之慶妾等幸叨女
職祇事掖庭奉觴共罄于歡心頌履敢傾于善禱

內中侍御已下賀太皇太后年節詞語

伏以獻歲發春肇三陽之交泰履端于始為萬物之權
輿恭惟太皇太后陛下繼善體仁正心率下布德行惠
順時令而罔愆知人安民固邦基于不拔肇履維新之

序更增有永之年妾等祇事宸闈幸逢聖治趨玉階而致禱祈寶厯之無疆

皇帝詞語

伏以歲移木德會天運之更端歷用夏時候人正而謹始恭惟皇帝陛下大明善照洪造無私不言而行四時靡愆消長正本而理萬事自致中和方歲旦之荐祥宜天休之協吉妾等幸叨嬪御獲隸宮庭仰瞻咫尺之顏願祝靈長之祚

皇太后詞語

伏以太族迴律物萌震起之端招搖指寅時布寬和之
令恭惟皇太后殿下仁覆邦國德配乾坤徽音不忘克
嗣齊莊之美彤管有煒尤高貞靜之風肇履端元倍迎
釐祚妾等叨聯禁掖獲事宮闈敢同九御之誠敬上萬
年之壽

春帖子

皇帝詞六首

五言

其一

乘震司春令先天布政經人時頒鳳歷農事視龍星

其二

光宅唐堯日暄和太昊春德如天溥愛性與帝同仁

其三

西昴昏當午諏訾旦在東聖君南面治常候四星中

七言

其四

律管已當人統月斗杓初建孟陬辰新修元祐萬年厯
今日纔開第五春

其五

五時讀令王春禮大駕臨朝晉室儀東作西成皆有序
欲民敦本使前知

其六

四時嘉節宴游稀盛德先從學士知每歲惟呈簇金帖

新春不和綵花詩

太皇太后閣六首

五言

其一

氣至風條達陽升土墳盈芸芸生物遂兩兩泰階平

其二

聖詔頒寬大天恩遍遐遐雷風孚號令草木動萌芽

其三

寶歷書推律春觴頌獻椒年年似今日三萬八千朝

七言

其四

冬後五旬逢歲朔臘前三白徧民田朝來淑氣先時至
又見春秋大有年

其五

荆楚牛人毆厲氣安豐棗腊祀蒼精聖朝雖舉前朝事
不為禳祈為勸耕

其六

上壽春朝覲外庭詔恩不許會公卿即時二史書謙德
只使羣官進姓名

皇太后閣六首

五言

其一

九扈方司啓潛陽已發春
瑤觴進椒栢眉壽祝靈椿

其二

冬至四十六三陽生此辰帝令天下壽鑽燧教斯民

其三

晝景添宮漏慈闈念女功常時浴蠶日親到濯龍宮

七言

其四

東郊青幘拜春迴迎得陽和次第來風向烏竿千里應
氣隨魚鑰九重開

其五

蓬萊殿裏春開宴長樂宮中帝奉親婦順母慈流美化
萬方歌頌贊娥莘

其六

花影遲遲轉午陰漸聞宮柳變鳴禽休呈金綵矜工巧
但閱圖書鑒古今

皇太妃閣五首

五言

其一

愛敬承三殿慈柔化六宮常膺萬春祝永繼二南風

其二

甲觀翔雲覆新宮晝漏長柳條初弄色梅蘂已飄香

七言

其三

聖皇欽翼孝心存宮閣深沉母道尊初慶新陽生解律
又聞清蹕過堯門

其四

天下太平今有象宮中行樂但迎新萬年枝上看春色
三素雲中望玉晨

其五

冰散瑤津波隱隱雪殘鵲氣葱葱新春游豫祈民福
紅傘凋輿從兩宮

夫人閣四首

五言

其一

曉漏催銀燭新春趣賀朝御香煙馥郁宮佩影飄飄

其二

歲近寒風薄宮深受日遲欲知春到處梅杏有新枝

七言

其三

良辰孟月長新陽和氣中宵徧未央不待望春宮轉漏
便趨崇慶殿稱觴

其四

君王崇儉化邦家禁掖承恩絕泰奢只擬討尋鉤盾籍
何曾雕刻上林花

教坊作語

坤成節集英殿宴教坊詞

教坊致語

臣聞日在鶉火當東朝誕慶之辰班集鸞庭奉聖主惠
慈之宴候涼風之始至望陰魄之初生鏘洋金奏之和
懸倒玉階之祝伏惟皇帝陛下繼天開統協帝重華休

承六聖之謨日視三宮之膳堯仁舜孝本天性之少成
禹度湯銘思日新而自戒伏惟太皇太后陛下乾坤合
德軒極儲神總裁萬務之微保佑丕圖之固遐邇一于
正寒暑平而三辰全中和致其誠天地位而萬物育屬
千秋之啓瑞闢三殿以均恩鄰邦之使傳星馳絕域之
貢琛麇至韶奏九成之曲人神以和嵩呼萬歲之聲中
外同樂臣濫居法部叅聽輿言上祝天休敢進口號

口號

首秋初望歛階冀侍宴千官供大庭法部重翻慈壽曲
譯場初上貝多經寶鄰雙節遙馳傳玉塞重闕盡撒局
企望璇宮同祝聖天南已見老人星

勾合曲

涼風應律天地之氣正中廣樂充庭金石之音載協望
堯雲之布濩延義轡以舒遲上悅天顏教坊合曲

勾小兒隊

龍墀赫眎敞平樂之都場雞唱紆餘上章溝之晝漏爰

命左觴之子恭陳右翟之儀上奉宸歡教坊小兒入隊

隊名

咸英調帝樂象勺舞童裳

問小兒隊

燕惠方宣皇歡允洽集沂童而在列聽舜樂以來庭並
當總角之齡早肄結風之妙雖嘉儀矩未辨音辭進步
天階各言爾志

小兒致語

臣聞厥初生民頌郅室興周之美豈樂飲酒歌武王在
鎬之歡適邁慶辰盛陳燕禮伏惟皇帝陛下德侔穹厚
道繼義軒豐宜日中萬物荷照臨之盛養以天下四方
形孝愛之風當辰火之西流近陰靈之中宿紀神符于
夢月錫嘉會于需雲擊玉攬金奏葛天之八闋望雲就
日祝崇慶之萬年臣等齟齬無知禁坊綴籍願進交竿
之藝預隨疊鼓之音未敢自專伏候進止

勾雜劇

鈞天廣樂方終萬舞之儀齊庭滑稽尚騁六章之辨瞻
采眉之允說當玉殿之風清少停促節之繁式佇觀優
之樂徐賡雅韻雜劇來歟

放小兒隊

髣髴就列聽儀鳳之純音霓袖回風盡翥鴻之妙態偃
旌旣畢投袂言歸再拜天階相將好去

勾女童隊

德能大于諸夏仰贊帝猷舞以行于八風佇觀樂節何

彼凌波之侶來陳曳繭之工上助宸歡兩軍女童入隊

隊名

簪纓三殿集干羽兩階陳

問女童

清商應律方歌既醉之太平長袖趨庭共獻無疆之萬
壽盤霞裙而霧集望冀陞以葵傾必有剖陳一一敷奏
女童致語

妾聞祥雲入戶天開降聖之符湛露晞陽詩載燕賓之

義屬金行之啓候瞻玉輦之臨軒肴醑旅陳君臣胥樂
伏惟皇帝陛下能哲而惠持盈守成廣庶績以釐工醵
九圍而式命日致其孝承顏靡怠于晨昏歲習其祥慶
節繼頒于宴衍嘉秋成之告稔應坤德之乘時觴禮九行
盡獻酬之厚意封人三請祝福壽之多祥妾等適在初
筭親逢盛際敢奏七盤之技交修八佾之行未敢自專伏
候進止

勾雜劇

輕裾應節已觀蹈厲之工前部獻能牙進俳諧之戲宮
商徐引雜劇來歟

放女童隊

霓衣度曲隨憂敵以停音竿木逢場騁隱辭而畢奏宜
收逸綴用協多歡再拜天階相將好去

興龍節集英殿宴教坊詞

教坊致語

臣聞德水澄清表一人之命世需雲宴樂荐萬壽之無

疆仁鄰通二國之歡旦暮慶千齡之遇伏惟皇帝陛下
亶聰稽古繼體膺期廣列聖之休聲奉東朝之慈保兵
寢刑措邁帝王之高功地平天成契君臣之胥樂載臨
誕日躬御廣庭王公獻甘露之觴法部奏承雲之曲臣
技非矇瞽籍著工師聽立我蒸民之謠幸逢堯世有請
祝聖人之語竊效華封瞻望宸嚴謹進口號

口號

赤龍應世季冬初上八開祥電繞樞金石宣和韶九奏

乾坤薦壽嶽三呼善鄰兩使星軺集拱極千官藥綬趨
共捧堯鍾歌既醉洋洋朝野正歡娛

勾合曲

八音克諧天地之和斯應百獸率舞人神之感攸同上
奉宸歡教坊合曲

勾小兒隊

九奏和聲已洽鏗鏘之韻兩髦侑子咸知蹈詠之儀上
奉宸顏教坊小兒入隊

隊名

子衿來鄭校長袖集虞階

問小兒隊

童裳兩兩初聞歌沛之音舞袂蹀躞漸轉浴沂之態威
顏咫尺廣樂諧和必有獻陳一一敷奏

小兒致語

臣聞日在北陸會日月之初躔天生聖人將天地之交
泰適遭誕彌之旦恭宣贊祝之誠伏惟皇帝陛下睿智

有臨惇大成裕中昃每勤于聽政晨昏不懈于承顏學
有緝熙于古先神功日就文以經緯于邦國睿問川流
當九龍浴聖之辰覩萬玉盈庭之盛指南山而獻壽挹
北斗以稱觴臣總角無奇執旌就列願效婆娑之技庶
形郁穆之風未敢自專伏候進止

勾雜劇

德音感人盛樂稍更于節奏笑言近道前書亦紀于優
辭方受景之初長奉宴慈而飾喜金絲徐韻雜劇來歟

放小兒隊

觀旅進于嚴塗式歌且舞既畢陳于衆技宜詠而歸再
拜天階相將好去

勾女童隊

分行颯沓飄然曳繭之姿應節紆餘儼若交竿之狀
羽旄在列鼓吹參和上奉皇歡兩軍女童入隊

隊名

七盤儀鳳集八佾綵鸞翔

問女童隊

麟殿深沉遐想鈞天之奏霓衣搖曳言觀激楚之工進
步宸庭悉陳來意

女童致語

妾聞瑤星虹渚啟皇王載誕之符金鏡露囊有臣庶交
歡之禮惟是歌詩之詠流為祝聖之詞伏惟皇帝陛下
凝命穆清儲神淵默體乾坤健順之德用致中和盡日
月照臨之區咸歸化育斗位建丑帝司執權嘉辰協慶

于冬成曼壽允符于地久妾猥聯綴兆擬贊睿神雖德與
天同詎發揚于仿佛而功由樂舞庶昭顯于毫分未
敢自專伏候進止

勾雜劇

舜樂既成尚少留于八列齊諧喜隱猶附益于三章望
天表之粹溫奏伶工之獻笑再賡雅韻雜劇來歟

放女童隊

圓步方趨逐雅音而畢奏颺回風轉宜退旅以言歸再

拜彤墀相將好去

紫宸殿正旦宴教坊詞

教坊致語

臣聞氣和而天地應慶集三朝燕飲而福祿來禮稱萬壽會仁隣之講好嘉使介之在庭享禮畢陳宸歡允洽伏惟皇帝陛下膺圖御世稽古承天孝治形于家邦仁風翔于海寓馳王驚霸貫三代之質文游凱步元任羣材之智勇凝成至治不冒多方當春令之始和御廣庭

而肆會周魚在藻簪纓同愷樂之歌虞鳳儀韶金石播
克諧之奏臣猥緣末藝獲造彤墀聆鈞天九奏之音如
遊帝所效上林千人之唱竊抒蕪詞仰奉皇歡強進口
號

口號

敦牂開歲斗回杓共慶元正視朔朝仗下法官陳禹會
宴開平樂奏虞韶北邦膚使星持節近侍詞臣頌獻椒
共效華封人吉語勤勤三請祝唐堯

勾合曲

千官雜還廣樂鏗鏘方義馭之晝延望天顏之豫悅引
商刻羽擊玉挺金上奉宸慈教坊合曲

勾小兒隊

詩詠君德樂舞后功允屬聖辰式資備物惟彼髫髻之
侶將陳蹈厲之儀上悅天顏教坊小兒入隊

隊名

簫韶虞氏樂歌舞沛中兒

問小免隊

春陽駘蕩雅奏諧和彼騰韞之分行逐羽旄而應節初
如詠于沂水又若歌于沛風必有所陳盡言爾志

小免致語

臣聞夏正孟月紀庶草之權輿漢會春朝受四海之圖
籍清蹕臨朝而置酒通班拱極以稱觴仰贊休辰式陳
盛樂伏惟皇帝陛下接千載之統題五精之期繩烈祖
之燕詒奉慈闈之謀訓陶鈞萬類物無疵厲之傷玉燭

四時氣協中和之應荐臨元朔夙講鄰歡禮食以勞於
使人樂舞以飾乎燕喜臣等方當蒙穉欣邁泰辰雖童
子之何知亦能蹈抃歌太平之既醉欲效揄揚未敢自
專伏候進止

勾雜劇

聽咸英之音備聞雅正觀優孟之戲佇獻俳諧綴兆少
留金絲徐韻上資允悅雜劇來歎

放小兒隊

日移映稷樂闋承雲蹁躑之態備陳獻笑之歡已畢徐
收霓袂還欽羽旌再拜天階相將好去

祭文

故美人陳氏祭文

維元祐四年歲次己巳七月己巳朔十九日丁亥皇帝
遣延福宮使寧國軍節度觀察留後入內侍省副都
知張茂則致祭于故美人陳氏之靈惟靈早以柔淑充
尚宮闈稟賦不融痛傷何已奠以醑醴慰茲營魂尚享

故美人陳氏葢塗祭文

故美人陳氏之靈眷言柔範奄謝芳年爰即葢塗特陳奠酌淑靈不昧尚或歆承尚享

故贈太師追封沂王曹侂啟殯祭文

維元祐四年歲次己巳十月丁酉朔十三日己酉皇帝遣中大夫試尚書吏部侍郎監護葬事范百祿等致祭于故贈太師追封沂王曹侂之靈惟靈奕世勲賢外門尊屬襲重侯累將之貴享上公王爵之榮居富貴而能

謙處燕閒而自養未登遐壽奄謝休辰將啟敢塗載深
感愴聊陳薄醑用寄哀懷尚享

舉靈祭文

維元祐四年歲次己巳十月丁酉朔十八日甲寅皇帝
遣中大夫試尚書吏部侍郎監護葬事范百祿等致祭
於故贈太師追封沂王曹佺之靈惟靈親則舅家貴為
王爵四朝寵遇位極公侯三命謙恭福兼康壽遽收神
于太素俄卜兆于佳城祖載有期盡傷斯至奠以穀醴

慰茲營魂尚享

下事祭文

維元祐四年歲次己巳十月丁酉朔三十日丙寅皇帝
遣中大夫試尚書吏部侍郎監護葬事范百祿等致祭
于故贈太師追封沂王曹佺之靈惟靈外戚賢王上公
貴秩蕃朝出入克保令名富貴始終奄歸窀穸載涓良
日式啟陰堂夙設奠筵庶殫恩禮尚享

贈貴儀林氏祭文

維元祐五年歲次庚午二月丙申朔十八日癸丑皇帝
遣昭宣使康州防禦使入內侍省副都知梁從吉
致祭于贈貴儀林氏之靈惟靈粵自先朝入充九御乃
眷良家特承恩顧詎謂嬪風奄先晨露將啟幽堂復增
遠慕尚享

殯日墳祭文

維元祐五年歲次庚午二月丙申朔十九日甲寅皇帝
遣昭宣使康州防禦使入內侍省副都知梁從吉致

祭于贈貴儀林氏之靈惟靈婦德之茂世胄之華恩承
先眷慶集王家芳年奄謝德音不瑕殯宮設奠恤禮有
加尚享

故蔡國長公主權殯前一夕夜祭文

維元祐五年歲次庚午二月丙申朔十八日癸丑皇帝
遣昭宣使惠州刺史入內內侍省押班馮宗道致祭于
故蔡國長公主之靈有苑天孫承華椒掖粵在韶年遽
淪月魄愛篤靡忘音徽永隔奠以清觴慰茲厚窆尚享

故蔡國長公主墳祭文

維元祐五年歲次庚午二月丙申朔十九日甲寅皇帝
遣昭宣使惠州刺史入內內侍省押班馮宗道致祭于
故蔡國長公主之靈惟靈分輝寶婺質禁庭瓊瑤夙
茂蘭苔早零嗟我同氣邁茲促齡嚴塗既啟精魄攸寧
尚享

欽定四庫全書

蘇魏公文集卷二十八

蘇魏公文集卷二十八

欽定四庫全書

蘇魏公文集卷二十九

宋 蘇頌 撰

外制

中書試制詔三道

御史中丞除河陽三城節度使制

門下中執法之官內以肅正于朝案十連帥之任外以
摠馭于藩方非有浚明之良曷膺東注之命出為屏翰

特竣寵章具官某姿度清夷學溫淵懿至言足以折衆
論闕畧足以慮四方詳試事為寢觀明效頃擢才于禁
侍俾長正于臺端伏奏青蒲動協盡公之義繩違白簡
時推司直之風朕方綏御邇講求政實文武之道聖
賢嘗述于弛張將帥之臣漢世亦求于左右眷盟津之
壁壘控朔道之襟喉遂輟謨謀之賢往分節制之重授
以戎律殿茲捍城於戲正色立朝爾既得為儒之效出
封加等予方示注意之私論七德宜先于安民長萬夫

亦所以觀政祇服休命益圖懋勲可

中書舍人除壽州觀察使制

勅唐制觀察使統領一道庶案列邦亦古牧伯之任也故大臣出鎮近侍剖符實更處焉其寄重矣近世以來居是職者止視其秩而不綜其治權任雖異而恩數益隆非得周才未嘗輕授具官某學洞幾先慮經世務頃以文章之高第置諸清切之通班七制坦明良多潤色之美諸儒論議咸服精通之才是用擢自禁塗出分方

任畀以壽春之牙節撫于淮右之封疆爾其省觀民風
勤求治效副予重外之寄佇乃宿官之成可

誠羣臣舉任必以賢詔

勅臯陶之謨于虞曰在知人在安民然則致治之原安
民為本欲黎民之安者非得其人而委之治則主澤靡
宣欲人材之叙者非選于衆而舉所知則治功莫建聖
賢相戒以為至難故前世天子任大臣大臣擇長吏長
吏辟屬僚皆所以同寅協恭上下交濟使野無遺逸之

歎而朝有明良之詠治之至也朕甚慕焉頃者屢詔中外之臣各舉賢能之士而進任雜選愚哲混淆將何以副朕寤寐之求為時楨幹之用重敷明訓使諭至懷自今被命荐才當官任使宜各思于公舉且彙別于人流牧民者必擇循良之方將領者務求精敢之類負學者須通于貫變辦事者可試于劇煩果得其人悉宜上達朕將試之以事觀其所長苟器業之可嘉亦甄褒之何吝倘靡諧于公議則具有于憲章昔鄼侯成功鄂秋被進封

之賞陳湯獲罪張勅蒙既死之誅治古若斯前規可監
咨爾有位勿忘盡公

皇族出官勅詞

牒奉勅自我祖宗惇叙邦族大則䟽封于爵土次則通
籍于閨臺並留京師叅奉朝請然而世緒寢遠皇枝益
蕃屬有親疎則恩有隆殺才有賢否則祿有重輕今而
一貫于周行是亦奚分于流別雖睦婣之道誠廣而德
施之義未周故廷臣數言宰司繼請謂宜定正限以等

曩朕惟親戚之間經史有訓漢唐之世典故具存或以
九族辨尊卑或以五宗紀遠近或聽推恩而分子弟或
許自試而效才能或宗子之賢得從科舉或諸王之女
自主婚姻盡前世之所行顧當今之未備況我朝制作
勳法先王豈宗室等差乃無定著因俾羣公之合議將
為一代之通規載攬奏封具陳條目以謂祖宗昭穆宜
從世世之封王公子孫抑有親親之殺若乃服屬之既
竭洎于才藝之並優在隨噐以甄揚使當官而勉懋至

于任子之令通婚之儀凡曰有司之常一用外官之法
僉言既允朕意何疑告于將來遂頒明命噫自義率祖
既殊升降之丈因時制宜斯盡變通之利咨爾宗盟之
衆固多博識之倫奉承新書當體朕意

翰林侍讀學士尚書禮部侍郎集賢殿修撰范
鎮可依前官充翰林學士

勅學士職親地顯非他官之擬倫內則承宥命之權輿
外則預清閒之訪問向非明于國家之體與夫老于文

學之流疇克周旋副我優待以爾具官某識通器遠內
勁外和擢于儒林置在禁序書命西掖則辭訓已孚視
草北門則論思有助間嘗試以政事故使治于輔藩能
平易而近民賦中和而樂職不待滿歲召還近班眷久
侍于經闈且垂成于廟史衆譽厥善朕嘉乃勤復咨鴻
藻之華再入內庭之直夫惟號令之慎出獻納之資忠
言成筆端澤布天下茲儒者之榮遇皆爾鎮之踐更益
告猷為用符眷倚可

觀文殿學士吏部尚書趙槩可太子少師致仕

勅夫起儒者而仕公卿享高年而歸印綬功名寵祿輝
煥于一時好德康寧幾備于五福非夫吉履素茂聞望
特隆克全始終蓋亦鮮矣以爾具官某躬秉一德用兼
數器文章增典冊之美事業本經綸之才在仁祖英考
之朝已推宿哲預機庭宰軸之議屢告嘉謨逮予纂承
實輔初政方仰成而尊禮俄委柄而願閒作屏東州甫
就燕林之適為時大老尚期咨度之來而累章引年抗

志彌篤倘諉以事豈曰優賢東儲六傅之班上臺三公之亞俾歸榮于里第且遂志于養頤彌晉太和益嚮遐壽茲朕所以勤勤于卿而不忘也可

侍御史張紀可司封員外郎

勅具官某御史紀綱之任治書謂之憲端南宮清要之司左曹號為華選惟是踐更之美實均出入之資以爾擢自文科屢登郡縣之最拔于遠守俾幹賦財之煩朕嘉其納忠置于言地自參持于臺務能振整于事綱方

幅屢聞直繩無隱屬議言之應陟加闕實之既優移進望郎之華且聯主爵之副宜欽承于渥命尚思告于謀猷行佇遠圖以副甄用可

屯田郎中權發遣三司度支判官吳幾復可都官郎中

勅具官某先皇帝嘗謂財計之司地要事叢艱于數易故于劇部為擇佐僚且更久職之科以待不次之舉爾幾復實以幹治應乎選求比聞坐曹最號辦職今有司

按閱謂爾頃倅邊州課登優格自改郎秩歲滿三期較
其在事之勤並應考功之令中都掌隸雖曰次遷支度
均財尚仍故守惟爾經術足以飾吏文敏足以治煩益
思遠猷用副甄擢可

都官郎中集賢校理吳彥先可司封郎中

勅具官某恭惟先帝留意藝文以謂養育賢材莫先儒
館因命丞弼並荐所知覆以文詞授之美職者蓋亦衆
矣朕嗣位之始爾彥先應詔來上是用試爾內禁置于

書林皆所以成先帝之美也今有司又言爾正秩郎內凡滿四期校其積勤甫應遷比是用昇爾主爵列于左曹亦所以旌服職之勞也夫賢者之于國家豈待爵祿而後勸惟茲叙進之法蓋亦功令之常爾其休承益懋遠業可

侍御史呂景可司封員外郎

勅昔有唐之世由御史而陞省郎者號為清選蓋以居紀綱之地則糾繩為煩贊喉舌之司則典領為重我得佳

士俾之迭居以爾具官某文雅清修端方勁正早仕州
郡廉能之譽聞于時其在朝廷獻納之言無所隱近召
從于州祭俾復踐于臺端方倚忠規之良遽上年庸之
最法當進秩寵以左曹所以厲風節之高而副清望之
擢也昔劉向有言忠臣雖在剛畝猶不忘君矧爾踐歷
清塗進榮華省尚思往訓無忘納忠可

岐王府記室叅軍尚書度支員外郎直史館李育
可司封員外郎

勅具官某今夫仕郎官者以左曹為貴升文館者以太史為先向非大雅博達之倫不在優遷兼直之比選任之際良亦艱哉以爾早擢甲科荐游書府召從方守置在王藩使吾親賢日聞道誼之益緊爾善識不懈討論之勤攬攸司之議年嘉奏課之應格進聯主爵之副以增望府之華漸履榮階益收後最可

翰林學士右諫議大夫知制誥滕甫可給事中充翰林侍讀學士知瀛州

勅朕東求時彥登置近班內則預基命之謀外則委折
衝之寄出處雖異眷遇實均方將詳試于事為是用優
加于寵數具官某文學足以濟時用論議足以輔朝猷
升之掖垣則詞訓擅其美擢于憲座則啟沃盡其誠洎
進直于複門益見推于善職朕以瀛闕藩會之要翔野
災震之餘謀帥惟難得爾良重趙張之治京劇已擅宿
名頗牧之在禁林宜膺閭寄對易金華之侍仍遷瑣闥
之聯俾綏定于一方且盡護于諸將夫牧民貴乎安輯

守邊務于威懷以爾敏明往必有裕佇聞職政之美用
副虛懷之咨可

右諫議大夫李肅之可依前官充天章閣待制權
知開封府

漢制以郡國二千石高第者入守京兆故彈治輦下常
為得人矧予近序之賢久歷雄藩之寄委之尹正必有
佳聲具官某生于名門素號敏達出將漕務入佐邦財
心計有餘治績尤著近以河濱地變朔土民騷爾職撫

邊疆日勤綏定繕完壁壘安輯民居曾不踰時克有成績是用陞雲章秘近之列典王畿浩穰之都豈特旌寵于事勞抑亦佇觀于才美往膺殊渥毋替後勤可

虞部郎中張允可比部郎中

勅具官某朕沿大比之制考庶官之成績錄其治能進以秩等所以均恩于在位而示勸于至公也今有司以爾有宿官之勤應考課之令宜叙遷于郎列仍故守于州封往復休息益圖後最可

前屯田郎中王覺前殿中丞袁庭芝前著作佐郎侍其璋可並舊官服闋

勅具官某等服勤效智早列周行銜恤去官近終喪紀日月云邁縞纈已除宜還簪紱之榮來就班聯之次秩雖不改命則維新勉思移孝之方以好揚名之效可

屯田員外郎李鑑可都官員外郎虞部員外郎黃宋卿可比部員外郎

勅具官某等古之在官者久而不遷故有三歲大比之

法今之從政者間或無職故議增年考課之令雖責實稍異而較勞則同以爾等夙以吏資置之朝序出敷民政並著事功攬齎伐之應條命推恩而進秩勉圖來效副我甄褒可

職方員外郎董公彥可屯田郎中比部員外郎馬中庸可駕部員外郎屯田員外郎黎持正可都官員外郎國子博士司卞盛和仲可並虞部員外郎太子中舍張璿可殿中丞

勅具官某設官以等則衆職舉有勞者進則羣臣勸歷古為治茲道實先以爾服在朝聯夙推幹裕歲月之效甫臨比最之期閱閱之資亦應叙遷之典遞增美秩用獎久勤益念修方以圖來效可

駕部員外郎李茂先可虞部郎中屯田員外郎馮
稹可都官員外郎虞部員外郎蔣僅可比部員
外郎

勅具官某等昔有虞之熙衆功也九載而能否別周官

之比羣吏也三年而治最陞夫授方任能效功書過久
則實已廢速則賞或僭四歲遷黜我得其中以爾等夙
以吏資仕于朝廷自登郎選屢試政條率職之勤訖無
曠事議年之課且應功書並進等于右曹示酬能于往
效尚思懋勉無忘欽承可

前石州方山縣令王佐可著作佐郎前泗州盱眙
縣令吳天常可睦州司法叅軍前監温州在城商
稅務傳變可並大理寺丞

勅具官某等久從掾令之職咸有幹庶之稱使者交章
攸司覆實言爾最狀甫應遷科朕親御便廷訾相其質
可以才使因而叙遷進屬上臺之聯益思良吏之守可

前權潤州觀察推官方仲謀前山南西道節度推
官郭子彥可並大理寺丞前權虢州軍事推官
譚仲衍可著作佐郎

勅具官某士之由選部而升京司者榮進之階漸也非計
最如格未嘗輕授今荐者以爾有幹蠱之譽而有司

又言應陟明之典臨引便坐擢為王官爾其益思登進之艱終圖遠到之效副我甄任不亦休哉可

前賀州錄事參軍夏侯戡可太子中舍致仕

勅具官某方強而進不能則止蓋仕者之常分也以爾服官累久視履寡尤來集銓臺願還王事其進宮坊之秩俾從鄉閭之居遂而宴休可謂光寵可

前秘書省校書郎胡行修可舊官服闋

勅具官某向從京省去執親喪當歲月之再期屬縞織

之畢祭宜還舊次式漸榮階倘懷報德之誠益念移忠之效可

太常少卿李獻卿遺表男景真可試將作監主簿勅某乃父任登朝列秩亞卿曹奄茲淪亡當有優恤以爾保家之秀俾霑延世之恩益慎操修克承餘緒可

皇城使向寶可貴州刺史依舊皇城使內殿崇班閣門祗候段充可內殿承制餘依舊

勅具官某等夫爵祿班等所以待有勞之臣勞而不圖

何以示勸爾等夙以精悍之質禦于疆候之衝能戢種
酋稟信威令攬元臣之列削述成效以良多爰嘉乃勤
遞增爾秩或視專城之守或承內著之聯俾以寵名益
重邊圉並為優異之典更佇撫綏之謀可

文思副使王慶可左藏庫使

勅具官某封疆之臣既勤撫輯歲月之勞宜有甄酬矧
帥畧之上功顧恩書而豈吝以爾早從武弁寢服使聯
自擢守于邊城能悉心于戎務稔聞治最加有年勤就

陞內使之職不易舊符之寄益思來效以答寵榮可

供備庫副使王諤可西京左藏庫副使

勅具官某內使之職副介有等考課之序遷次惟優非其累勞豈應明陟以爾夙以才武服于禁廷數臨外局之繁方督中都之役校年庸而應最躋班等以陞華更厲爾能以稱斯寵可

前內殿承制李從吉可舊官服闋

勅具官某早登勇爵嘗效邊勞俄服親喪既終祥祭奉

追書而來集還舊次以參榮服內著之聯無忘厥守展
四方之事佇集爾勞可

前隴州錄事叅軍賈選可澶州別駕致仕

勅具官某服勞吏役歷職郡綱今以老而自言嘉其勤
之有素俾參州佐之秩以為鄉閭之榮既遂爾私是亦
優典可

涇州管內觀察使舒國公從式奏百姓醫人李詢
可試國子四門助教不理選限

勅具官某嘗學禁方能通診法近宗侯之苦疾訪高手以視調屬覽奏封具言爾力因其藥喜之應假以版授之榮祇服新恩益勤善術可

回鶻進奉大使李延吉可右監門衛將軍

勅具官某代籍西安久陶于聲教職修方貢不替于忠純涉疆候以良勤護琛珍而遠至嘉其誠欵需以恩章特陞環尹之聯俾重裔夷之觀采思恭順以答寵嘉可

茭村族軍主李懷德可本族都軍主

勅具官某屬者羌落內侵偏師外禦爾在捍邊之列自
陳折首之功守帥為言累勞可尚特推榮于命秩俾率
厲于戎豪祇服休恩弗忘忠蓋可

蘇魏公文集卷二十九

欽定四庫全書

蘇魏公文集卷三十

宋 蘇頌 撰

外制

觀文殿學士兵部尚書知青州歐陽修可檢校太
保充宣徽南院使判太原府

勅國家規恢裔邊並建帥領惟河汾之一道搯獫狁之
二垂爰咨袞路之賢往付并門之筦仍遷近府用壯奧

藩以爾具官某道德文章為時矜式謀猷忠亮預政累朝自獲解于台司已再更于郡寄委遠時柄爾雖樂于燕安尊任賢能朕豈忘于寤寐眷言大鹵方擇守臣俾從表海之邦就改近邊之鎮班通四貴所以褒寵于舊勲節制諸戎所以倚成于外閫惟爾同寅之德體予注意之隆亟即新州毋辭遠畧可

前戶部尚書叅知政事張方平可依前官充觀文殿學士知河南府兼西京留守司

勅三年之喪聖賢不可踰禮六職之任朝廷所以仰成
粵予鼎飪之良近闕苴麻之制甫更中月當復通規就
委居留之權固無中外之間具官某蘊天人相與之學
挺金石不移之心被遇累朝極清崇于禁複逮予初政
遂擢贊于鈞衡適告訏謨俄嬰鉅創服衰去位久深藥
棘之情鑽燧變時已畢縞織之祭矧任崇于體貌方渴
佇于猷為姑還革履之朝仍錫玉符之寄殿塗秘職蓋
優異于老成洛宅中圻俾尹釐于王會是惟付畀之重

式示眷毗之隆宜諒至懷往欽成命采務同寅之守副茲
注意之勤可

翰林學士右諫議大夫知制誥王陶可依前官充

侍讀學士知蔡州

勅左右之臣內則參毗于國論屏翰之任外則綜輯于
民經矧予禁複之賢屢啟偃藩之請特推寵數使遂宴
安以爾具官某風節峻凝謀猷敏濟預兩朝之言責陪
望苑之雋僚肆朕纂承間咨忠益典領臺閣嘉言日聞

于前宣布中和惠問風傳于下入揔大計再登內庭方
好有為之圖俄聞移疾之告懇辭事柄析州符既重
違于至誠姑為擇于便郡陪京而近莫如淮右之優進
職而行遂易金華之秘爾其敷施寬政迎導粹和神明
泰寧則何恙而不已邦國順否當乃心而不忘深體眷
懷尚期來譽可

翰林學士承旨魚端明殿學士翰林侍讀學士給
事中知制誥王珪可禮部侍郎

勅惟我仁祖享國永年盛德成功將傳于萬世備言廣
記必藉于三長間咨博洽之材入預刊修之職筆削之
載方覽奏篇之來感愴之餘良嘉善志之美以爾具官
某文章高第經濟閎才承密命于內庭屢聞忠益領諸
儒于東觀甫就編研追書四紀之見聞大備一朝之典
法言觀類例咸自裁成惟史氏之懋官有前書之舊比
宗伯典禮天臺貳卿用旌善職之勤且慰述先之念欽
茲寵渥體我眷懷可

翰林學士守尚書禮部侍郎范鎮可守尚書戶部

侍郎

勅夫廣記備言之書編年繫日之史古稱善志時謂難
才矧乎仁祖之聖德神功一朝之文紀武律載述之任刊
輯良勤既克成于信書宜顯褒于直筆以爾具官某識
通器遠學富文高內庭嘉獻納之謨東觀預編摩之選
發凡起例有古良史之風積思潛精成我一王之法奏篇
甫上懋賞宜優中臺常伯之聯左戶地官之貳叙陞厥

秩用獎爾勞往膺遷渥之華益矜猷為之美可

尚書祠部員外郎充集賢校理陳繹可度支員外

郎依舊充職

勅具官某昔揚雄稱太史遷所記謂之實錄然則實錄之名蓋取夫不虛美不隱惡而為言也今夫紀一朝之典法事有巨細辭有詳畧載述之際去取良艱必資衆才以裨闕漏以爾博學敏用久次詞林往行前言多識古義命討論于史觀助刊約于信書發例惟精奏篇益

善序進望郎之秩且甄載筆之勤茂對寵章無忘勉懋
可

昭宣使入內侍省內侍副都知利州刺史充本
州團練使張茂則可宣政使餘如故

勅先帝之史朕不敢輕自丞相至于儒館之士預其職
者更五六人焉可謂重矣而又擇親信之臣以關掌世務
所以欲其謹嚴而無廢闕也以爾具官某端良矜恪久
侍禁庭典領周旋備觀才致揔史闡之政令更歲律之

炎涼屬其成書嘉乃勤事寵進使名之美用增近序之華往服恩章益宣忠藎可

尚書刑部郎中充天章閣待制再任知渭州都總管經畧安撫使蔡挺可右諫議大夫依前充天章閣待制令再任

勅朕以平涼之郊楹戎夏之要乃眷西顧每念謀帥之艱既得其人良思責任之久就加顯命式壯塞垣以爾具官某時才敏明士論嘉美服朝之寵陟天臺禁閣者

累年由陝而西更漕節將牙者三府矧自殿臨于藩隴
益能控制于氐羌保鄣繕完士伍服習方倚保邊之重
遽聞換郡之求雖諒乃誠尚難其代夫將帥戒乎數易
夷狄畏乎宿名宜躡進于右坡俾重留于外閫爾其體
國深意毋憚久勤講邊善謀克終厥譽坐恢遠畧用副
眷懷可

屯田郎中張次立可都官郎中

勅具官某六書之學世久不傳文字舛偽通俗交錯非

夫貫習于古隸詎能訂正于簡編以爾博學名聞潛郎
歲久游心墳史之暇刻意蒼雅之餘典校鴻都既復中
經之備體章言字學多沿鏤版而失真刊而定之成
篇來上嘉其積思寵以一官往惟欽哉膺茲顯命可

未復舊官人都官員外郎董經臣可職方員外郎
勅具官某或謂赦非公平之典然而在仕者或緣註誤
而寘于理非有寬宥則廉良之士曷由而洗滌乎以爾
向典方州縱逸有罪在法當黜度情非它屬逢慶霈之

恩固有原官之比復還舊秩仍列清郎毋以一眚之微而忽遠圖之效可

屯田員外郎鄭顥可都官員外郎太常博士陳紘可屯田員外郎秘書丞彭慥可太常博士

勅具官某士之通籍于朝而服職于外積累日久且四期矣既克成于治效又能適于過尤茲而不遷何用勸善以爾詞學中科選闕陞閤臺荐者稱其廉勤有司上于課最咸應恩格宜有甄揚稍進一官之榮使有羣吏

之勸體茲恩渥懋乃事功可

金部員外郎沈扶可司勳員外郎虞部員外郎

張宗道可比部員外郎

勅閨臺之選昔重為郎閥閣之優法當遷秩屬攸司
之上課加在事之歷年用示恩褒具如令格以爾具官
扶仕富吏資之敏任更使節之煩以爾具官宗道地承世
胄之華職預計籌之佐咸有善狀應于最條況久陟于
省闈宜遞陞于官次等功清列司計右曹嘉爾有勞

使之進拜茂對疇庸之命益思任責之艱可

屯田員外郎李景融等轉官

勅具官某南宮為郎昔號清要太宰計吏法有黜陟嘉
上課之應條宜甄能而進秩以爾士科擢秀朝會參華
涖官聞敏給之稱布政協庶良之善省闡承務蚤踐于
六聯恩典陟明復遷于一等服我甄褒之渥勉思忠蓋
之誠可

秘書丞充三司勾當修造案公事孔嗣宗可太

常博士餘如故

勅具官某夫列朝閨之籍雖以次遷參計省之僚本由才選閱乃年資之久嘉其治等之優所宜甄疇稍進班級以爾學縕充茂才資敏明試吏有勞知已言狀寘之大農之屬亦既宿官陞以奉常之聯聊用旌伐欽承獎擢之命益念忠良之為可

國子博士李及可虞部員外郎

勅具官某仕宦至尚書郎者在古為要今雖不涖省

事徒假名秩顧其品列猶為顯華以爾策名清時通籍
閨著入奉朝請出為民官結課有司校勞累歲擢進中
臺之序茲為近路之榮祇服恩褒勉勤績用可

守殿中丞姚稱可國子博士

勅具官某國家校羣吏之勞有四載之比雖積日頗久
而辨材益精苟非顯庸不在遷比以爾仕列通籍職更
治民幹敏有聞循廉可任爰覽計書之上當陞班著之
榮祇服恩華勉收治效可

前權大名府推官蘇轍可西京留守推官

勅具官某富文敏學早擢秀科大對危言繼膺清舉方
講圖于才畫助寬析于計條遽有開陳願從補外復優
參于賓幕且贊務于留都既遂爾私益思遠用可

西京左藏庫副使高遵裕可依舊西京左藏庫副
使兼通事舍人

勅具官某惟上閣贊司之職蓋右列清要之塗非夫材
稱顯聞不得兼領以爾勲門華緒內使宿名久戍邊防

克奮忠毅圖上方略嘗聞善謀守圉封疆方收遠績擢
預典儀之秩用增武爵之榮益思盡規以答殊寵可

皇城副使桑湜可西京左藏庫使

勅具官某并絡之野畫為二川帥節撫臨每擇近班之
彥兵防督護參咨內使之良以爾素練機鈴累更事任
提兵隴右已著能名易地劔南荐分優寄仍進京司之
長用光蜀道之行體我推恩更思竭節可

海州刺史充本州團練使王振可左千牛衛大將軍

海州團練使

勅內領諸衛外摠團兵視武爵以甚高非勞臣而弗處
將優舊望使得兼榮以爾具官某拳勇之謀早司禁旅
公忠之守屢試邊防閔其年事之侵思有華階之寵陞
之環列仍彼使權既遂處于安榮尚不忘於報稱可

西京作坊使知忻州孫京可尚書虞部員外郎

勅具官某士之懷材抱器惟所以見用於時然後功名
可異豈有文武之異哉爾向列朝闈荐者謂爾通知四

夷故易以內使之名而付以邊兵之寄屬時無事不克
設施章言自陳願還故守郎官清要復以命爾治人循
法皆爾所宜惟其盡規乃有成效可

內殿承制王克昌可供備庫副使

勅具官某守邊之吏以綏靜為功滿秩有勞寵褒何吝
爾向由廷列往護蠻陬撫字之勤汔無曠累廉平之守
復逾過尤宜進秩于內司用甄能于遠效荷茲優典深
盡忠規可

內殿崇班任雍可內殿承制

勅具官某夫列職廷中秩視閭臺之貴提兵塞下任均師律之嚴皆右著之優遷非良才而靡稱以爾精剛之質久事周行積累之勤亦應比最特遷承于朝制仍往護于師屯益思盡忠乃克任事可

樞密院兵房主事李景先可吏房副承旨

勅具官某宥密之嚴地均公府丞史之任職專吏門雖曰次遷尤為遴擇以爾首公勤辦在事謹廉嘉積久于

勤勞當進聯于曹務益宜欽慎思對恩榮可

東頭供奉官南永可內殿崇班

勅具官某內殿之列秩有二等皆通籍于朝閨而隸名
乎樞府由三班吏以次遷者校其年資亦已久矣惟爾
治效有應斯格擢陞近序所以甄勞采堅瘁勤用稱恩
獎

東頭供奉官竇世隆可率府率致仕

勅具官某七十致仕禮經之訓也爾為吏有年飭躬寡

悔顧筋力而難強豈簪裳之可縈嘉其自陳宜有優寵
陞以東儲之秩俾為居里之榮祇服恩私足慰遲暮可
奏舉人前權知夔州節度推官張擇言等改官

勅具官某等九卿之屬皆有丞佐視其間要以為等差
非得廉良不在茲選以爾等或詞科之秀或世緒之華
試吏有勞荐章交至宜各因于資籍俾並列于京司被
茲寵擢之優益念公忠之報可

奏舉人前杭州昌化縣令章蒙等改著作佐郎

勅具官某在昔明世莫重親民之官肆我治朝爰開舉
吏之法得人既效懋賞必行以爾術業甚修庶方自表
久從銓筦之調已試宰字之能累歲有勞知己言狀擢
序蘭臺之秩漸階鸞黨之榮益慎持操乃副甄獎可

前權雄州防禦推官張天占前天平軍節度推官
知遂州遂寧縣事韓繹前權府州軍事判官張
禧可並大理寺丞

勅具官某等或決科從仕或延賞入官並有良吏之資

外從諸侯之幕臺章言狀銓筦條勞辨職者敏幹可稱
字民者拊循有效用擢王官之列且丞刑寺之聯勉思
後勤勿渝素守可

試秘書省校書郎知海州海豐縣黃長裕可大理

評事

勅具官某瀕海之郡去朝廷遠甚而寇賊乘險剽掠使
民不得寧居斯長人者之所共病也以爾為令于彼能
勤厥官親格奸兇遂平宿黨擢升京寺之籍用勸才勞

之臣往服優恩益圖後效可

太子少師致仕趙槩奏男光祿寺丞元緒可大理
寺丞親孫大理評事嗣真可光祿寺丞

勅具某官等大臣請老當推寵異之恩世嗣傳家爰錫
顯揚之命以爾等蚤由門調並列京司屬我耆英歸休
里第特厚賞延之渥遞增祿秩之榮列卿之丞初仕為
貴宜勉遵于緒業庶能保于慶宗可

行太常寺奉禮郎席延年可行大理評事

勅具官某仕者世祿所以承家官以賞延是亦近古復沿考陟之比間有次遷之榮循致華階由此始矣爾之資履既應于吏條國有彛章當陞于班等往承斯渥益念後勤可

丁憂人前寧州司戶叅軍楊傳可特免持服充忠武軍節度推官同管勾鄜延路機宜文字

勅具官某親喪之重情不可違王事之嚴禮有權奪爾為邊州掾以才畧聞遭憂免官倚廬行服宜起腰于墨

經且陞案于賓筵往典軍書而贊帥畧毋堅爾恤當體
在公可

文林郎守南康軍都昌縣令裴士章等職官知縣
勅具官某縣令之于民最親也一失其人則下有受敝
自保任之法興而多以稱職聞者甄勞獎善其可廢乎
惟爾之能實應茲選宜陞賓幕之秩再付邑章之榮爾
其善撫元元克終厥問褒擢之典吾豈吝焉可

德妃苗氏奏遇南郊乞親侄習進士苗仲淵可將

作監主簿

勅某朕親祀郊丘布慶中外眷惟妃戚之族例有賞延之科而爾之諸姑職崇宮掖言爾有立祈寘仕階京籍起家勉思宦學可

儒林郎前乾寧軍司理叅軍孟英可試大理評事勅具官某爾從久選調歷職掾曹齎閱天官之銓試吏丞相之府事稱勤辦法應次遷姑從事于典藩典支計于外府宜收課最矜副甄揚可

翰林傳寫待詔承務郎守少府監丞顏和可河中府榮河縣太寧廟令

勅具官某居工技之列擅寫照之能執事有年服勞可紀因自陳于幕齒願退居于祠官既遂爾私宜勤厥守可

右班殿直孔塏可洺州別駕致仕

勅具官某爾為吏有勞擢陞仕籍效官寡過進列廷班年未至而告休力不能而知止宜遷州佐之秩使遂退

居之安既適爾私是謂優渥可

登仕郎守利州文學趙象可利州司馬

勅具官某登名為吏坐法奪官向叙散曹適逢大需稍
遷典午之秩庸示棄瑕之恩可

溪洞高州四甲巡檢田守元男洪惟可銀酒監權
充溪洞高州四甲巡檢

勅具官某介于邊裔服我聲明屬乃父之云亡攬邊臣
之列奏命爾襲職特示推恩美秩榮階並優于渥澤深

溪重嶺就俾于邏循宜罄忠純用保寵祿可


河北都轉運司空名攝助教五道

勅漢法使民入粟縣官得以拜爵今爾以貨貲應募州
郡得不推恩而獎勸之假秩一命俾為爾榮益思良心
以對甄渥可

磁州空名助教二道

勅某朕聞民阻饑遣使賑恤且俾土豪之入粟用助縣
官之振窮爾財雄州閭義服隣里來應募格願輸滯藏

嘉其嚮勸之誠錫以甄旌之命尚安鄉校足為寵光可



蘇魏公文集卷三十

欽定四庫全書

集部

蘇魏公文集卷三十一至三

詳校官庶吉士臣朱理

檢討臣何思鈞覆勘

總校官進士臣朱鈐

校對官編修臣盧遂

謄錄監生臣施華

欽定四庫全書

蘇魏公文集卷三十一

宋 蘇頌 撰

外制

右諫議大夫權御史中丞呂誨可落御史中丞依

前官知鄧州

勅御史之職所以表正朝位分判忠邪舉錯或違綱領
疇寄以爾具官某分卿華胄文學清流踐履閭臺休有

風力伏蒲抗論稔聞獻替之嘉冠豸在庭方竚猷為之
補而屢陳奏牘訾毀輔臣黨小人交構之言肆罔上無
根之說比令辨析遽服過差

四句係中添

朕雖務于含容爾

奚安于要近姑仍正諫之秩出擁南陽之麾噫正色立
朝固忠賢之所守言事失實在典憲之當行既觀過之
則然亦原情而非甚尚從薄責俾就外遷勉勵省循究
理自訟可

翰林學士兼侍讀學士寶文閣學士禮部侍郎呂

公著可守御史中丞

勅朕惟御史之任內承本朝之風化外為列位之表率
治古所尚官儀特崇諒非正人未易稱選以爾具官某
文章識度諸儒所宗論議風采中外推伏先帝置之經
幄複門掌于命書嘉謀屢告于膝前善政已施于京劇
兼是數器可謂大臣惟爾一門公卿三朝侍從久宜登于
近用尚有避于當塗况朕方以至公待人不疑羣下豈以
弟兄之任事而廢朝廷之擢才矧在仁祖之時已格親嫌

之制臺端之拜無以易卿是用輟三學士之清班委中
執法之要地爾其深體至意言念匪躬無自拘于細文
亟往踐于厥位肅正朝寀敦厚時風矜觀猷為以輔台
德可

尚書刑部郎中判三司都理文憑由司秦玠可兵
部郎中

勅夫考功課吏之法雖不足以待非常之人然居官幹
職者歲久而不遷則不免夫賢愚同滯之累議年進秩

其可闕乎以爾其官某識用純明姿韻恬曠奉使稱最
治郡有聲正籍郎臺久擅宿官之效贊煩計部荐推應
務之才姑閱吏勞稍陞班等七兵華序實冠右曹三使
別司尚仍故守毋謂次遷之薄足為階漸之榮勉務欽
承式副登擢可

尚書屯田郎中諸王宮記室葉紆可都官郎中

勅其官某迺者參擇宿儒為僚官郎使以經藝諭吾宗
親爾以學術之該通從邇臣之保任始專講勸復主文

書勤且歷年謹于率職攬攸司之上課在恩格以應遷
即其郎闡陞以班等茂對甄褒之命益思訓導之方且
俾藩侯樂于為善繫爾之能事也可不勉哉可

王銑可左衛將軍駙馬都尉

勅王姬下嫁詩美車服之隆主壻奉朝唐增階品之貴
矧惟先帝之子已正藩侯之儀歷求士倫克對嘉禮以
爾具官某出于華胄茂乃素風蚤服習于詩書喜親近
于儒雅藹然令器見推舊門是用擢于環列之班參彼

副車之職台司視秩憲坐兼榮用光選尚之恩并示褒
優之命噫連姻帝室接武外朝寵冠一時望高三尉保
其祿位當務于矜修久而室家更思于抑畏服我辭訓
無忘夙宵可

權濮州團練推官充吳王宮教授姜潛可大理寺
丞差遣如故

勅具官某先皇帝念宗室之衆多顧學校之廢缺並擇
時彥以為教官宜有勸率之條俾專講習之益以爾潛

高誼著于東國善誘聞于上庠選自成均置之國邸洎傳經而泣職加閱歲之屢周教導有倫安恬可尚命遷丞于卿屬且旌善于藩僚爾其欽承訓我宗屬且無忘先帝之舉也可

都官員外郎權發遣三司都磨勘司無主轄支收拘收司公事杜訴可職方員外郎差遣如故

勅夫公卿子弟習聞朝廷之典故周知臺閣之儀範擢處要任必有能稱蓋有唐之舊事也以爾具官某出于

名門稔服忠教嘗主臺劾近更郡符號為廉平克紹前烈向用邇臣之薦超備司計之員析利既精議年且久姑緣考課之比稍進右曹之前爾其休承益思率厲大爾門構副予寵章可

屯田郎中李杲卿可都官郎中

勅具官某朕遠攬周漢上法祖宗緣考功課吏之程著議年增秩之令所以待有勞之士而嘉久職之人以爾生于德門仕以科選稔聞吏治之譽方貳皇華之行積

有年庸應我恩格矧累更于郎列復進秩于中都雖曰
汎遷且酬善最尚仍煩使之舊益懋遠圖之休可

職方員外郎陳傳可屯田郎中虞部員外郎孫昱
可比部員外郎

勅具官某等考陟之典尚矣自有虞以來未之或廢盖
疇能比吏勸功賞善有國之法不可闕焉以爾等委質
策名居官任職民政有拊循之效郡綱藉闕決之明稽
閱四期嘉事勞之可錄進班一等亦酬勸之所存服我

恩榮終期報稱可

都官員外郎新差通判南安軍劉炳可職方員外郎差遣如故

勅具官某夫山澤之禁所以佐助大農通貨豐財待是而出以爾朝宋之望幹器有聞頃仕嶠南專司地寶能督兆人之役用資園府之供績效甚明賞格斯在叙進省曹之秩尚仍倖乘之行祇服恩榮勉勤職守可

虞部員外郎崔復可比部員外郎國子博士徐稹

李舜元可並虞部員外郎

勅具官某夫考功課吏之法雖不足以待非常之人然士之懷能抱器雜進有司不有甄陞何用勸善以爾淹歷朝序稔更歲成于法當遷進官有等爾其體我恩意勤宣政事倘素縕于才用宜勉力于施為毋曰汎遷而薄後最可

殿中丞致仕許弼可虞部員外郎致仕

勅具官某朝廷推慶賜之澤而不遺退休之人者所以

旌尚止足而示寵高年也以爾早階仕綴得謝盛辰兩
逢優渥之行未逮叙遷之比特緣往霈躡進華階南宮
右曹俾榮鄉閭爾其祇率益務保頤可

殿中丞賈忱可國子博士守衛尉寺丞侯可可守大
理寺丞

勅具官某廉能之選早列于仕階撫字之求方紆於邑
綬屬攸司之比課謂滿歲以應條進以一官甄其累效
勉思勤儆往服恩榮可

大理寺丞晏祇德可右贊善大夫

勅具官某爾以丞相子仕隸京司能持謹循保守門法
試以幾征之局頗彰幹辦之稱克逾過尤有足嘉尚攬
攸司之會課屬累久之當遷進陟春坊之僚使通朝著
之籍其思自勉益振緒風可

衛尉寺丞劉士劭可大理寺丞

勅具官某夫任職四歲有勤最而無悔尤不有遷叙則
士之沉滯者衆矣以爾為丞卿寺歷試吏條攸司類能

加秩有等其進理官之屬益思政治之宜可

前權知雲安軍判官馮越石前華州下都縣令張
杲之可並著作佐郎集慶軍節度推官前知磁
州文城縣彭天麟可大理寺丞

勅具官某等士之由選調而陞京司者始用外官之保
任加復有司之視成最狀上聞便廷臨引貲相其質
數納以言然後命之良亦艱矣惟爾閥閱之茂咸應斯
格有如辭章之美並由科級而仕擢以臺秩俾為王官

漸階通顯之塗益慎進趨之守可

袁州分宜縣主簿前虔州受納板木場兼監排岸
司劉最淮南節度推官前知鄆州中都縣事王
仲安可並大理寺丞劔南四川節度推官前知
梁山軍梁山縣事趙清可著作佐郎

勅具官某等或決科從仕或延賞入官並有廉能之資
綿更縣邑之課臺章言狀銓筦條勞辨職者敏幹可稱
字民者拊循著效用擢京司之列茲為貴仕之階勉思

後勤勿渝素守可

前建州建安縣主簿監南劍州石牌場郭綱可大

理寺丞

勅具官某國家謹山澤之禁非惟專利公上抑亦止民
爭端官或有勞賞亦用勸以爾詞科進擢吏調淹回以
閩邑勾稽之員督卹人物地之役五歷年稔倍登貨程
特遷卿棘之聯蓋示賞條之信爾其欽率思稱恩榮可

曹州南華縣尉王洎可太常寺奉禮郎

勅具官某朕以東畿積寇多出曹南故嚴設捕格之科
以除生聚之患以爾得調銓筦往專尉循能奮勇謀悉
擒兇黨擢爾京司之秩欲示信賞之行其益祇欽以對
光渥可

常州無錫縣尉扈大亮可杭州餘杭縣令

勅具官某夫萑蒲不戢則閭里靡寧賞典不行則倣勸
安在以爾調名銓筦為吏江湖謹于尉循號有方畧屬
彼寇攘之黨肆為戕賊之謀一舉成禽羣凶就戮嘉其

善職之效寵以長人之官其勉懋于遠圖善撫綏于美俗副我甄擢無忘瘁勤可

皇叔前右監門衛大將軍克眷皇叔前右監門率府率克近克慕皇兄前右武衛大將軍榮州團練使仲論可並舊官服闋

勅具官某孝子念親情何以極惟三年之中制蓋天下之通喪眷吾近宗動必由禮既畢居廬之慕宜還拱著之榮以爾慶衍皇支位通閨籍向緣銜恤久去辨朝閔

寒暑之再離屬縞纈之云釋俾仍舊次庸示新恩勉惇
信厚之風茂對休嘉之命可

前左藏庫副使曹誦西京左藏庫副使曹識可並

舊官服闋

勅具官某天下無事兵革不試仕武列者咸得喪親以
禮所以盡人子孝愛之情也以爾生于慶門早服義訓
銜恤去位釋禪從公斯得孝忠之全宜還位著之列欽
承新渥益勵後圖可

文思副使胡拱可左藏庫副使

勅具官某朕以累朝陵邑邈在澗瀍並建官司典領封域爾向由內使祇事真園職為寢郎累更歲稔朝夕起居之奉無曠爾勞春秋荐告之儀亦參厥守比代還而言狀嘉往效之良勤稍還主帑之職茲謂疇庸之命往承優渥益務欽修可

文思副使李惟忠可左藏庫副使西京左藏庫副使蘇信可文思副使供備庫副使李惟清可西

京左藏庫副使

勅具官某等內朝諸司參設使介所以待材武之士為
帥領之基惟謀勇兼資乃副超擢而課最應格亦得稍
遷爾等勤能守官才任禦侮積日累久之課既應陟書
歷階加等之榮寢居前列宜益圖于方畧且無廢于事
勞服我訓言以永終譽可

左藏庫副使曹繼明可供備庫使西京左藏庫使
雍規可文思使內殿崇班閣門祇候王文郁可

內殿承制依舊閣門祇候內殿崇班韓見素可

內殿承制

勅具官某夫仕者久而不遷則才愚同滯進而不以其效則流品弗甄今有司所以限年而校功循階而進秩者由此道也爾以材武擢于治朝內外煩使之勞訖無曠事歲月薦更之比已應陟書稍陞等于官聯且疇庸于閔閔往承新渥無怠後勤可

前文思副使衛克明可舊官服闋

勅具官某列職禁庭早擅勤恪之裕服喪至室已終縞禫之期宜釋素冠超還舊著內司之介班等惟優勉遵移孝之方無怠首公之志可

西京左藏庫副使蔚世長劉輔可並文思副使

勅具官某內朝諸司並置使介所以視典領之閒劇為遷次之等差惟其職儀亦號通顯以爾仕以才武能輯吏勤陞諸使聯荐更歲律齋闋來上有勞當遷稍增陞級之榮庸示甄疇之渥承茲寵典厲乃公忠可

供備庫副使宋惟渥可西京左藏庫副使

勅具官某朕所以屢戒邊疆之臣不使生事夷狄者誠欲慰安吾民綏靖殊俗也爾向以廷中之籍出監嶠外之兵歷稔三周善撫師衆外虞無警成效可嘉俾遞進于使聯示不私于賞格往服休命更勵後勤可

前內殿崇班康曷可舊官服闋

勅具官某任繇武弁服在朝行屬時偃兵靡事社革遘家艱而銜恤遵禮式以行喪歲月其周縞禫云釋宜起

還于舊次當益念于教忠祇服訓言勉勤職業可

內殿承制王懷淳司允可並供備庫副使

勅具官某等武爵之選籍隸于樞府者是為朝班由此而升諸司者又為優選雖議年而進秩亦寓令于擢才爾等資適逢時官亦久次應是寵格叙躋使聯蒞事局者宜勵于廉勤護師屯者益思于訓輯祇服休命勉圖後功可

右屯衛將軍致仕徐用文可右武衛將軍致仕

勅具官某朕初嗣鴻業大賚四方首覃慶恩靡限遐遠
惟彼引年之類例加增秩之榮以爾給事禁庭夙推勤
愿退居近甸克享壽康宜沾渙澤之優稍進衛環之列
祇服休寵益保餘齡可

內殿承制郭昭誨可供備庫副使

勅具官某夫武爵之設所以待材勇之人方無事時士
特以積日而進取然揔戎幹邊皆由此出授任之際良
亦難矣以爾克有幹力嘗試事勞較其年勤甫應遷格

進陞內使之貳漸履華塗之階無以易進而自安當念
遠謀之可致斯謂勤獎爾其欽承可

內殿崇班王世安可內殿承制

勅具官某夫考課之法議年有等並甄闕閱之最非有
文武之殊以爾早用材謀服勤官次淹歷已久庶能可
稱且緣計最之程進陞班制之列褒遷之寵勉懋其承
可

東頭供奉官陳永齡可內殿承制

勅具官某南海百貨之所叢四方商賈之駢集惟其繁
富之會是亦剽盜之招以爾官守遐陬職在循警能殄
除于寇黨且安慰于民居成效既然推恩何慙往服內
朝之籍益思方畧之圖可

東頭供奉官趙渥孫穆之可並內殿崇班

勅具官某等仕之隸三班者其任使特為冗而遷次又
復稽緩然由此而陞內著者蓋積日已久而陳力且多
矣以爾服勤吏役能寡過尤應課攸司亦在最等命通

聯於殿籍斯漸履于榮階宜益矜修以稱甄錄可

東頭供奉官趙定可率府率致仕

勅具官某夫仕貴量力而進欲知止此士大夫之所美也爾居武弁能蹈斯言壯而從官老而謝事是可嘉尚所宜顯褒擢于儲禁之班俾從家居之秩保爾暮齒承茲寵榮可

西頭供奉官郭右之可右清道率府率致仕左侍

禁李昭懿可左清道率府副率致仕

勅具官某早從職守充集吏勞洎列庭班亦更事任自言耄及願獲歸休宜擢進于儲僚俾退居于里閭承茲秩老之命慰爾暮塗之榮可

右侍禁呂嬰可左清道率府副率致仕

勅具官某爾以州郡之課得列仕階以歲月之勞屢陞班等自言齒耄願謝官榮特遷宮率之聯俾遂家居之佚可

守少府監致仕王山民男漸可守將作監主簿

欽定四庫全書

卷三十一

勅某男某乃父仕宦三品年至告歸閔其久勤延以世祿以爾早聞家訓克紹素風擢宜京司俾階榮路往承新渥益懋爾思可

翰林醫學富州龍平縣主簿潘務本可少府監主簿餘如故

勅具官某爾以方技之能為王官之守向逢霈澤方役遐陬歲滿言歸慶條具在擢預京司之秩且甄執藝之勤服我休恩益精素業可

左諫議大夫知瀛州李肅之奏醫人孔世卿可試
國子四門助教不理選限

勅具官某方技專門診治有法給事帥卹服勤累年屬
覽奏封之陳且援近侍之比寵以一命足為爾榮可

秦州東路弓門寨界蕃巡檢副都軍主張朴令狐
可銀酒監武充本族都軍主原州之安寨白家
族都虞候薛乞可銀酒監武充本族副軍主

勅某職于邊候號有才謀俾式遏于諸戎且無虞于外

境藩臣列奏寵命惟行進膺帥領之榮架盡封陞之效
可

蘇魏公文集卷三十一